

Powšitkowne WOZJEWJENJA

njedźelu, 16. septembra 2018

Běh wo pokal zbóžneho Alojsa

Składnostnje lětušich 75. posmjertnych narodnin zbóžneho kapłana Alojsa Andrickeho su sportowcy wšěch starobnych skupin wot šěsć lět na běh wo pokal k jeho česći srjedu, 3. oktobra, do Radworja přeprošeni. Započatk při sportnišću je w 10 hodź. Běhać budže so na čarach po 500, 1.000, 1.500 a 6.000 metrach. Přeprošeni su jednotliwcy runje tak kaž cyłki, na přikład šule, wosadne kružki, sportowe jednotki a wjesne kluby. Na běh wo pokal zbóžneho Alojsa přeprošuja Towarstwo Cyrila a Metoda z.t. (TCM), Sportowa jednotka 1922 Radwor, wjesna skupina strony CDU, Radworska gmejna a Radworski młodžinski klub. Zajimcy měli so hač do srjedy, 26. septembra, za běh přizjewić, po móžnosći z mailku na Katolski@Posol.de abo telefonisce w redakciji Katolskeho Posoła pod čisłom (0 35 91) 55 02 12.

Patronatna Boža mša w Chróśćicach

Wobydlerjo a přistajeni Domu swjateje Ludmile w Chróśćicach woswjeća štwórtk, 20. septembra, swój patronatny swjedzeń. Džakna Boža mša budže w 10 hodź. we wosadneje cyrkwi. Wšitcy wěriwi su wutrobnje přeprošeni. W. Brězan

Nyšpor z požohnowanjom zapřahow

Towarstwo Cyrila a Metoda z.t. přeprošuje tež lětsa na wosebity nyšpor domchowanki z požohnowanjom konjacych zapřahow. Tutón budže njedźelu, 30. septembra, w 14.00 hodź. w Chróśćicach na łuce při Hatkach. Chróśćanski cyrkwinski chór a wosadni dujerjo jón wuhotuja. Wšitcy wěriwi su wutrobnje přeprošeni.

Eksercicije za Serbow – Boži Duch wožiwa

Hladaš-li na čłowjeka, widziš na jednotliwcu, hač je bojaziwy, strachociwy, bjez nadźije abo bjezmócný a so poda. Samsne płaći za wšelake skupiny, haj druhdy samo za cyłu towaršnosť. To pak njeje zakładne křesćanske nastajenje. W jednym z listow swjateho Pawoła rěka k tomu: „Přetož Bóh njeje nam dał ducha bojósće, ale mocy, lubósće a rozważnosće.“ (2 Tim 1,7)

Kotry duch nas wjedže? Mje wosobinsce, moju swójbu, w powołanju, w towaršnosći, w tutym času? Wo tutech prašenjach budu na eksercicijach za Serbow wot pjatka, 9. nowembra, wječora hač do njedźele, 11. nowembra, připołdnja rozmyslować. Dny rozpominanja chcedža pomhać rozeznawać mjez žiwjenja spomóžnym a žiwjenja strašnym duchom, mjez dobrymi časowymi prudami a tymi, kotrež žiwjenje niča. Rozpominanja, modlenje a čišina njech pomhaja, so dale a bóle wot Božeho swjateho a swjatosćaceho Ducha wožiwić a wodzić dać.

Wěriwi ze serbskich wosadow su přeprošeni, so na tutech dnjach wobdźelić. Přizjewjenja přijimuju pak direktnje w Exerzitienhaus HohenEichen, Dresdner Str. 73, 01326 Dresden, info@haus-hoheneichen.de, telefonowe čisło (03 51) 2 61 64 10 abo w Chróśćicach na farje, telefonowe čisło (03 57 96) 8 04 00.

Zetkanje młodostnych a młodych žonow

W Budyskim klóšterku wotměwaja so prawidłowne zetkanja młodostnych a młodych žonow, zo bychu so wo swoim žiwjenju z Bohom wuměnjeli a zhromadnje swójski žiwjenski puć nadešli. Přichodne tajke zetkanje je wot pjatka do njedźele, 28. do 30. septembra. Wone zahaji so pjatk we 18 hodź. z wječerju. Kónc je njedźelu z wobjedom. Wutrobnje přeprošene su młodostne a młode žony mjez 14 a 35 lětami, kotrež za swojej wosobinskej žiwjenskej čaru pytaja. Přizjewić móžeja so zajimče w Budyskim klóšterku, telefonowe čisło (03591) 21 10 83 abo z mailku na klarissen@gmx.de. Tam zhonja nadrobniše informacije.